



El ò attratg en grond public: Igl star-saltunz ucrain Sergei Polunin.

FOTOS ORIGEN

Belabagn 20 000 visitaders

Origen Festival Cultural

DA GION NUTEGN STGIER / ANR

■ **La stad culturala d'Origen vo ainten la fasa finala. Giovanni Netzer, igl iniziand digl pi grond festival da cultura digl Grischun, fò ena bilantscha positiva. Sonda tgi vign suonda a Riom anc la surdada digl Premi Wakker tgi vign bagn ad esser igl punct culminont dalla stad.** Dumengia proxima totga la stad culturala 2018 digl Origen Festival Cultural gio agl passo. Igl feil cotschen da chella è stada la Russia, ena tera cun ena istorgia multifara, ena cultura fitg vasta e blera litteratura per preschentar chella an tung e maletg. Laschea receiver la revuluziun russa d'avant 100 onns ò *Giovanni Netzer* cun cant, musica, solt, teater, rachints ed exposiziuns. Cun deditgeir las passa 150 produziuns alla Russia ò el tscharnia en tema tg'ò sviglia fitg igl interess digl public. Chel è nia an rotscha, detg pi concret on belabagn 20 000 visitaders catto la veia ad egna u l'otra dallas preschentaziuns ed exposiziuns digl Origen Festival Cultural.

En public fitg internaziunal

Tgi igl festival vegia attratg tants visitaders seia cunzont er d'attribueir allas produziuns da solt, accentuescha Netzer. Cumparaglea cuagl public digls davos onns vegia Origen chesta stad gia en public blier pi internaziunal, dei igl scienzio da teater. Vurdo ord vista internaziunala vegia igl solt blier daple muntada tgi na-

ziunal, menziunescha igl iniziand digl festival cultural. Cun esser aint igl frataimp las produziuns da solt tgi Origen preschainta da nivel fitg or e da nivel mundial vegia igl festival er sa fatg en nom sur igls cunfegns svizzers, dei igl Surmiran. Graztga agl solt seia la ladezza d'Origen daventada per en po pi vasta, averta e libra, dei Netzer. Igl public internaziunal vegia er sa laschea plascheir las produziuns da solt. Schi blers resungs positivs scu chesta stad vegia el mai gia an chels prest 15 onns tgi dat Origen, manegia igl om da Savognin. Solt seia ena moda angratztevela per interpretar an ples stils, cun emoziuns, plagn expressiun e differents muvimaints rachints ed er istorgias realas, menziunescha Netzer. Igl «magne» dallas produziuns da solt seia cler sto *Sergei Polunin*, el tgi vegia en status da renom mundial.

Sergei Polunin turna bagnspert

La produziun tg'ò attratg en grond public e tg'ò er sviglia igl pi ot interess medial è sto igl teater da solt «Sacrè» cuagl star-saltunz dall'Ucraina *Sergei Polunin*. Las quatter preschentaziuns ainten la halla da tgalvalger a Son Murezza èn stadas cumplettaimaintg vandeidas or. Scu tgi Netzer dei vess anc en grond domber d'aspectatours lia neir agl solt e teater e chegl sa tgapescha angal perveia da Polunin. Mintga de dattigl tar Origen dumondas schi igl star-saltunz turna puspe aint igl Grischun. Chegl seia er la

raschung da preschentar igl settember danovamaintg igl teater e solt «Sacrè», pero betg a Son Murezza, mabagn ainten la tor sen Gelgia, punctuescha Netzer. Da preschaint ins seia er vedlonder da montar las soptgas stablas ainten la tor da teater, uscheia tgi pigl avigneir vegia la tor ena buna infrastruttura.

En «Wakker» onn

La stad da «Wakker» ò igl Origen Festival Cultural er gia a Riom, agls Mulegns e sen Gelgia plessas exposiziuns. Chellas vegian contribuia blier agl success da chesta stad, dei Netzer. Cun singulas exposiziuns ins vegia lia mussar tge tgi sa lascha tot far per dar daple veta a bietgs, vischnancas ed all'economia. La sia feanameira seia venavnt da realisar a Riom ena pitschna manufactura da textlias, manegia igl purtader digl Premi cultural grischun. Igl antier festival vegia sa tgapescha er profito chesta stad digl Premi Wakker tgi la Nova Fundaziun Origen retscheva sonda proxima a Riom. Grond plascheir vegia el tgi las produziuns «Café Sibiria» ainten la sala digl hotel Liun agls Mulegns vegian carmalo en grond auditori. «Ia va gia grond plascheir tgi er blers indigens èn nias per tadlar las canzungs rumantschs e l'istorgia da Pieder Caplazi», manegia Netzer. Totpiglia seian alloura er tot las otras produziuns d'Origen stadas fitg bagn occupadas e chegl cun visitaders da gliunsch e da manivel, concluda Netzer.



Salto sensom igl pass ò er en ensemble da solt giapunes.



Da tot otra taimpra è sto igl concert da Peter Conradin Zumthor e Vera Kappeler.



Igl Ballet statal da Minca ò incanto igl public a Son Murezza.



Blers visitaders èn er nias a Riom perveia dallas differentas exposiziuns.



La tor sen Gelgia è er adattada per cantar cant sacral.



Passa 40 gedas è sto da vaseir igl toc humoristic «Maestro Margherita».